

瓊山縣官師志目錄

武功

唐

馮益

宋

潘美

陳升之

王介

元

朱斌

明

周旺

汪滿

吳成

花茂

吳傑

吳端

瓊山縣志卷十八

官師目錄

楊暘

崔聚

龍昇

王燧

馬澄

張經

歐陽必進

韓恭

武鸞

柳珣

吳良知

黃應甲

劉崇文

柏維實

續蒙勳

黃鉞

王選

王熙

國朝

高進庫

江起龍

楊廷

謝謙

蔡璋

張瑜

謫宦

唐

姚紹之

楊知至

宋

李綱

趙鼎

李光

胡銓

何興

明

薛顯

桑慎

孫岳為

劉玉

流寓

隋

楊綸

唐

瓊山縣志 卷十八

官師目錄

二

劉納言

胡元範

李靈夔

辜璣

吳賢秀

宋

弭德超

王昇

劉昉

陳好初

張伯麟

李孟博

王廷珪

蘇軾

蘇過

周秀梅

元

文宗

撒迪

王仕熙

月魯帖木兒

懿憐真班

明

汪廣陽

薛祥

楊升

康鑑

穆維敬

李安仁

解縉

王直

崔永

徐益

吳均

梁良玉

鐵仲名

唐益

汪廷貞

莊維春

艾璞

連盛

國朝

楊纘烈

吳光昇

瓊山縣志 卷十八

官師目錄

瓊山縣志卷之十八

官師志二 武功 唐 宋 元 明 國朝

唐

馮盎字明達通志高州良德人譙國夫人孫蕭累代志

為本部大首領盎少有武畧隋開皇中為宋康

令仁壽初潮成等五州獠叛盎馳至京請討之

文帝敕左僕射楊素與盎論賊形勢素曰不意

蠻夷中有此人大可奇也即令盎發江嶺兵擊

之賊平授金紫光祿大夫仍除漢陽太守通志參新

舊唐書隋亡奔還嶺表有眾五萬番禺新興賊高

法澄洗寶徹等受林士宏節度殺官吏盎率兵

瓊山縣志 卷十八

官師二武功

破之寶徹兄子智臣復聚兵拒戰盎進討兵始

合釋曾大呼曰若等識我耶眾委戈袒拜賊遂

奔潰擒智臣等悉有番禺蒼梧珠崖地蕭自號志

總管高州志或有說盎曰自隋季崩離海內騷動

今唐雖應運而風教未浹南越一隅未有所定

公克平五嶺二十餘州豈與趙陀九郡相比今

請上南越之號盎曰吾居南越於此五代本州

牧伯唯我一門子女玉帛吾之有也人生富貴

如我殆難常恐弗克負荷以墜先業本州衣錦

便足餘復何求越王之號非所聞也阮通志武德

初歸唐立僭崖振三州蕭志以盎為高州總管封

耿國公資治通鑑

宋

潘美大名人開寶三年以桂道行營都部署尹從珂為副將兵平南漢四年劉鋹降遂有嶺南地得州六十縣二百四十瓊始歸宋蕭志

陳升之官保義郎熙寧十二年撫降樂會白沙崙黎王邦佐部眾俘獲林智福等瓊管司上其功

同上

王介南雄保昌人慶元中崙寇標掠鄉村逼城下介遂奮勇擣其前鋒卻之以功擢武德將軍御賜旗題云海外四州都安撫使阮通志

官師二武功

二

瓊山縣志 卷十八

元

朱斌徐州人國寶子至元十八年同濶里吉思平

黎蕭志

明

周旺廬州人高郵千戶洪武二年領兵開設衛所

蕭志

汪滿洪武二年同周旺追羅已終於交阯

吳成以百戶分司海南

花茂巢縣人洪武十五年以廣州左衛指揮僉事

征海南叛賊有功陞都指揮使二十七年同安

陸侯吳傑百戶吳端巡歷瓊南招集安撫奏築

海口南山二城二十八年議立南山千戶所平
崖州千家村各崗永樂四年復征平羅活崗蕭志
吳傑安陸侯洪武二十七年同都指揮花茂巡歷
招集民丁充軍二十八年築砌海口城撥後千
戶所備禦

吳端廣州前衛中所百戶洪武二十七年進征海
南

楊暎合肥人以湖廣平章定海南後封滎陽侯贈
芮國公同上

崔聚懷遠人少從永樂起兵宣德元年拜左參將
隨征虜副將軍柳升討黎利升失機兵挫聚整

瓊山縣志

卷十八

官師二武功

三

軍至昌江賊來益眾官軍殊死鬪賊驅象大至
陣亂賊大呼降者不死官軍或死或走無降者
聚力戰被執百計降之終不屈死阮通志

龍昇雷州人副千戶宣德間奉調征崖攻東界等
崗擒男婦數十前後斬賊級數千補海南正千

戶陵水志

王燧籍貫失載雷州揮僉奉委守瓊攝衛印與知
府蔡浩和衷共濟軍民樂業盜賊屏跡成化五
年平黎賊符那南時有都指揮李祐參將馬澄
先後平落窰黎又宏治三年參將姚英平賊陳
那洋

馬澄參將成化十一年征落窰黎

張經字廷奐侯官人正德丁丑進士有文武才出

鎮兩廣平安南及瓊州黎進兵部尚書俱同上

歐陽必進字任夫廬陵人正德丁丑進士累官兩

廣總督時黎獍流毒珠崖乞師討之前後斬獲

甚多面縛者幾千人不三月班師獻徵錄

韓恭大興人雷州左所副千戶隨調瓊州府征黎

賊屢立戰功保吉營之敗衆皆先奔恭獨殿後

賊至反兵陷陣力竭而死雷陽志

武鸞廣西人瓊州參將嘉靖十九年崖陵各縣黎

歧蠢動鸞奉檄同參將董廷玉劉經北山屯指

瓊山縣志 卷十八

官師二武功

四

揮戚振廣州衛指揮劉海等領兵分哨勦捕斬

獲無算捷聞各陞俸一級賞賚有差

柳珣安遠侯升五世孫襲祖爵嘉靖二十年奉命

統兵征黎擒斬五千誅其酋三十人加少保卒

贈太保諡武襄明史稿同時有廣南衛指揮錢大

有李元爵俱從征嶺脚黎有功蕭志

吳良知字廷通少習孫吳法嘉靖時倭寇爲患海

道譚綸薦授把總三戰三捷歷陞廣東瓊崖參

將每戰必誓師令無殺掠故所向成功浙江通志增

黃應甲萬曆五年以總兵官鎮廣東屢被海賊斬

獲無算優叙進秩倭寇瓊崖應甲斬首二百餘

奪其舟再賜金旋入僉左軍府罷歸卒明史李錫傳

劉崇文南寧衛指揮萬曆十九年委撫瓊山黎蕭志

柏維實雷州指揮萬曆十九年調征黎賊同上

續蒙勲字世階處州衛人襲衛指揮多膂力後掌

衛篆陞雷州白鶴門千總築兩埠修營房入戰

擒倭寇百三十餘人斬首二百級遷都閩坐營

合勦珠崖黎寇以破巢功最陞參將阮通志

黃鉞浙江上虞人武狀元素有韜畧膂力過人累

官瓊州參將萬曆四十二年崖黎滋擾統軍征

討厲士卒具糗糧與陽電參將葉應春署雷廉

參將楊應春廣西柳慶參將熊大經廣州衛指

瓊山縣志

卷十八

官師二 武功

五

揮王中耀白沙寨把總王熙葉思義等刻期進

勦大小凡十餘戰俘馘不可勝計大挫黎蠻民

賴以安鉞後陞潮州總兵蕭志

王選黃岡人由廣東都司署瓊崖參將萬曆四十

二年同征崖黎

王熙白沙寨把總萬曆四十二年同征崖黎後陞

遊擊俱同上

國朝

高進庫陝西人順治九年總鎮瓊州平服黎崑進

秩都督同知廕一子蕭志

江起龍江南徽州人順治十三年任水師參將駐

劄白鴿寨始至營署俱圯無城塹可守乃捐貲立營寨招居民屯聚爲墟市商賈畢集康熙三年遷海安龍遂進副將五年出洋捕盜風發舟覆殞焉叠著神異雍正九年

欽定英佑驍騎將軍之神起龍爲人仁勇忠直故生著

匪躬之節歿顯利涉之功宜膺大典云

郝通志

楊廷潮州人康熙八年瓊鎮左營千總隨征逆賊

王之銑陣亡優卹

同上

謝謙揭陽人康熙中海寇楊二聯等犯儋耳謙與

瓊山令茹鉉協勦設伏突攻大敗之焚巨艦五

擒長毛賊二十七人辛酉二月賊復聚數萬寇

瓊山縣志

卷十八

官師二武功

六

擾東西路陷海口所暨澄邁定安諸邑將逼郡

城謙率七舟併力鏖戰一晝夜身被數十鎗力

窮被執不屈死

大清一統志

蔡璋字秉鉞福建晉江人康熙十九年由江西水

師總兵調順德鎮抵任首治戰艦詰戎兵定汛

守明賞罰逾年簡舟師徑突海陵出賊不意傾

其巢穴賊謝昌走外洋旋與楊二洗彪合勢復

振會犯瓊南璋率師渡海賊分三路拒敵璋麾

樓船結大陣令槩舸迎潮擊其尾大敗之斬獲

僞官弁等六百餘級生擒三百人餘悉赴水死

救回被擄子女三千餘人悉分遞回籍數年海

患以息阮通志

張瑜虎門藩委副將相傳謂康熙十九年海逆謝

昌之亂戰死今祔享瓊山縣江起龍祠郝通志

瓊山縣志 卷十八

官師二 武功

七

官師志三 謫宦 唐 朱 明

唐

姚紹之湖州人初以鸞臺典儀累遷監察御史中宗時擢左臺侍御史坐贓五百萬法當死韋后女弟救請故減死貶瓊山尉阮通志

楊知至字幾之刑部尚書汝士之子登進士第歷浙東團練判官為宰相劉瞻所善薦其才學擢比部郎中知制誥中書舍人瞻既謫外知至亦貶瓊州司馬及瞻起復入為諫議大夫終戶部

侍郎同上

宋

瓊山縣志 卷十八

官師三 謫宦

八

李綱字伯紀邵武人政和二年進士宣和中金人

渝盟欽宗受禪綱為尚書左丞與耿南仲議不

合徽宗南幸還京綱請防秋南仲阻之以綱主

戰恐防和議遂罷綱金兵再至上悟和議之非

召綱勤王未至而都城陷高宗即位拜右僕射

兼中書侍郎上十事擬姚崇要說力諍張邦昌

僭逆罪不可赦請贈恤死義諸臣上從之尋為

黃潛善汪伯彥所譖落職徙萬安軍安置至瓊

浹旬詔移雷州祀景賢祠蕭志

趙鼎字元鎮解州聞喜人高宗三年六月霖雨詔

言闕政鼎時為司勳員外郎疏曰今日之患始

於安石成於蔡京而安石配享京黨未除朝政之缺莫大於此遂罷安石配享十一月自右司諫拜侍御史所言四十事施行者三十有六拜中丞平章事五年與張浚並爲尙書左右僕射六年十二月鼎求退浚總中外政多叢脞七年九月求去帝問誰可代者言及鼎浚曰得之復以鼎爲尙書左僕射八年十月戶部侍郎向子諲奏事久中書舍人潘良貴叱之退帝欲抵良貴罪中丞常同爲之辯並逐同鼎奏同與貴不宜逐帝不從由是出鼎知紹興府秦檜率宰執餞之鼎不爲禮一揖而去檜益憾之十年閏六

瓊山縣志

卷十八

官師三諫宦

九

月貶清遠軍節度使潮州安置十四年九月徙吉陽軍謝表有曰白首何歸悵餘生之無幾丹心未泯誓九死以不移檜見曰此老倔強猶昔十七年八月卒鼎自安置來杜門謝事門人故吏不敢通問惟廣西帥張宗元時餽膠米檜聞之令本軍月具存亡狀鼎遣人語其子汾曰檜必欲殺我我死汝曹無患不爾禍及一家得疾自書墓石記鄉里及除拜歲月且書銘旌云身騎箕尾歸天上氣作山河壯本朝遂不食而死明年得旨歸葬孝宗朝追封豐國公贈太傅諡忠簡祀景賢祠上

李光字泰發上虞人高宗朝參知政事紹興間秦
檜主和議光斥之謫瓊州安置居八年仲于孟
堅坐陸升之誣以私撰國史成獄呂愿中又告
光與胡銓賦詩倡和議訕朝政移昌化軍論文
考史怡然自適年逾八十精力不衰亭臺多所
題咏後三年以郊恩復左朝奉大夫至江州卒
孝宗朝復資政學士諡莊簡祀景賢祠同上
胡銓字邦衡江西廬陵人建炎二年高宗策士淮
海見而異之將冠多士有忌其直者移置第五
紹興五年除樞密編修官八年王倫使金偕虜
使還以詔諭江南爲名中外洶洶上詔羣臣議

瓊山縣志 卷十八

官師三謫宦

十

和金得失銓抗疏切直書上連遭貶竄時宜興
進士吳師古餽其書於木金人募之千金朝士
陳剛中以啓事賀銓之謫皆坐流貶通銓初謫
福州再竄新州時州守張棣承秦檜旨論銓與
客唱酬謗訕怨望詔送海南吉陽軍編管所居
裴氏之廬卽趙鼎故寓先是銓在新州時嘗夢
謁趙鼎又嘗夢見黎母山至是悉驗在崖日以
訓傳經書爲事黎會聞之遣子入學二十五年
檜死量移衡州孝宗卽位召還蕭隆興元年遷
秘書少監擢起居卽嘗侍上於後殿內閣上曰
卿流落海島二十餘年得不爲屈原之葬魚腹

者實祖宗天地留卿以輔朕也銓流涕答曰小
臣三遷嶺海命出虎口豈期今日再見天日上
亦收淚曰卿被罪許久可謂無辜天下知之不
在多說乃就坐上曰卿向在海南爲詩必多答
曰臣向居嶺海時日率作詩十數首初任福州
簽判以詩詞唱和得罪故遷新州及居新州又
以此獲譴復徙吉陽軍甚矣詩詞能禍人也既
蒙錄用靜思二十年前爲之墮淚乾道七年除
寶文閣待制留經筵求去上問今何歸銓曰歸
廬陵臣向在嶺海嘗訓傳諸經欲成此書特賜
通天犀帶以寵之銓歸上所著易春秋周禮禮

瓊山縣志

卷十八

官師三
蕭

十一

記解詔藏秘書省

宋史本傳

何興道州人理宗時朝議大夫直言敢諫遷政府

以丁大全譖謫瓊州

蕭志

明

薛顯蕭人趙均用據徐州以顯爲元帥守泗州均
用死顯以泗州來降授親軍指揮鄧仲謙據新
淦不下顯討斬之以功擢江西行省參政進行
省右丞洪武三年冬大封功臣以顯擅殺胥吏
獸醫火者馬軍及千戶吳富面數其罪封永城
侯勿予券謫居海南分其祿爲三一以贍所殺
吳富及馬軍之家一以給其母妻令功過無相

掩顯居海南踰年帝念之召還予世券二十年
冬卒贈永國公諡桓襄

明史本傳

桑慎字仲修世居常州遷嘉興洪武初任監察御史有廉能聲苦行力學以行部海南奏誅衛使張榮坐不避入議安置瓊州未嘗怨懟動止合理尋復召還

蕭志

孫岳爲建文時都督守鳳陽嘗毀太祖所建寺材修戰艦以禦燕軍燕王知其有備取他道南下

永樂元年鄭賜劾之詔安置海南

阮通志

劉玉字仲璽磁州人生有膂力給侍曹吉祥家從征麓川授副千戶積功至都指揮僉事天順元

瓊山縣志

卷十八

官師三

十一

年以奪門功進都督僉事尋充右參將守備潯州慶遠蠻剽博白及廣東之寧川玉偕左參將范信邀擊敗之俄命分守貴州從方瑛討東苗殲於把豬討西堡苗擊其魁楚得先後斬首千級毀其巢而還旋改右副總兵鎮守貴州吉祥誅玉下吏當斬以道遠不與謀免死謫海南衛

千戶

明史本傳

官師志四 流寓 隋 唐 宋 元 明 國朝

隋

楊綸隋宗室滕穆王瓚之子性宏厚解鐘律封邵國公煬帝時被誣怨望除名為民謫始安是年帝親征遼東綸欲上表請從軍自効為部司所遏未幾復徙珠崖及天下大亂為賊林士宏所逼攜妻子竄儋耳後歸唐封懷化縣公 阮通志

唐

劉納言 新唐書作訥 精漢書學為當時宗匠乾封中以

漢書授沛王賢及賢為皇太子累遷太子洗馬兼充侍讀嘗撰俳諧集十五卷以進太子及東

瓊山縣志 卷十八

官師四流寓

十三

宮廢高宗見而怒之詔除名後又坐事配流振

州而死 舊唐書本傳

胡元範申州義陽人文明元年徐敬業兵起太后

召裴炎議事炎奏曰皇帝年長未俾親政乃致猾豎有詞若太后返政則此賊不討而解矣御

史崔察聞而上言曰裴炎若無異圖何故請太

后歸政乃命御史大夫鞠之鳳閣侍郎胡元範

奏曰炎社稷忠臣有功於國悉心奉上天下所

知臣明其不反太后不納光宅元年十月斬炎

於都亭驛之前街元範坐救炎流死瓊州 舊唐書裴

炎傳

李靈夔高祖第十九子也垂拱四年與兄元嘉子黃公譔結謀欲起兵應接越王貞父子事洩配流振州自縊而死

阮通志

辜璣莆田人唐禮部尚書永貞元年撥遷瓊州任

軍民指揮卜居東河湖上村因田禾傷旱勸民

鑿井導泉灌溉至今東河人賴之

舊志

吳賢秀唐戶部尚書行實失紀明嘉靖戶部郎中名會期其後裔也

同上

宋

弭德超滄州清池人宣徽北院使兼樞密副使太

宗下詔奪官職與其家配隸瓊州禁錮未幾死

瓊山縣志 卷十八

官師四流寓

十四

宋史本傳

王昇咸平六年遼師大入圍望都王超帥定州路

行營與鎮州桑贊率兵赴之帥副王繼忠在陣

東偏契丹出其背遮絕糧道人馬乏困繼忠馳

前與契丹戰超贊遂旋師繼忠孤軍沒焉上即

遣劉承珪李允則馳往察退衄之狀且言李福

王昇當戰先旋昇決杖配隸瓊州

宋史王超傳

劉曷字子蒙開封東明人元符末進士與王家交

通事敗開封尹盛章議以死刑部尚書范致虛

為請乃長流瓊州

宋史本傳

陳好初名豪晉江人嘗受學於楊時後在太學與

陳東上書留李綱及東被誅遂變名遊瓊州家
於蒼原子孫繁盛張志

張伯麟太學生嘗題壁曰夫差爾忘越王殺而父
乎秦檜怒杖脊刺配吉陽軍阮通志

李孟博上虞人莊簡公光之子也苦學有文紹興
五年進士第莊簡南遷隨侍至貶所遂卒於瓊

州同上

王廷珪安福人胡銓謫海南廷珪以詩送之曰癡
兒不了公家事男子要爲天下奇蕭志

蘇軾字子瞻眉州人蔡卞論軾掌制詞譏斥先朝
三貶至瓊州別駕昌化軍安置初至僦官室以

瓊山縣志

卷十八

官師四流寓

十五

居有司猶謂不可寓城東之天慶觀結庵枕柳
樹下僭人運甕畚土助之獨與幼子過著書時
從父老遊若將終身焉凡三年徽宗立移廉州

祀景賢祠阮通志

蘇過字叔黨軾子年十九以詩賦解兩浙路軾爲
兵部尙書任右承務郎及軾貶儋州獨過侍行
凡生理晝夜寒暑所須者一身百爲不知其難
初至海上爲文曰志隱軾見之曰吾可以安於
海島矣因命作孔子弟子別傳其颺風賦早傳
於世叔轍每稱過之孝且言吾兄遠居海上惟
成就此兒後復著斜川集二十卷同上

周秀梅宋翰林學士高宗時同子榜昌大理寺評
事避難來瓊卜居東洋文山村子孫繁衍科甲
綿長稱巨族云舊志

元

文宗武宗次子名圖帖睦爾英宗時爲親王丞相
鐵木迭兒懷私固寵構釁骨肉以咬住告出居
海南晉王立召還封懷王居建康晉王崩燕帖
木兒迎王於江陵襲帝位

撒迪從文宗於潛邸又隨召回建康尋以海北憲
僉按瓊文宗立爲治書侍御史以從龍之舊賜
鹽引六萬贍其家順宗朝爲平章政事時燕帖
木亦從於瓊後召拜相

瓊山縣志

卷十八

官師四流寓

其

王仕熙

綱目仕作士

字繼學北海東平人晉王朝參政

致和戊辰秋燕帖木兒謀逆執仕熙下獄迎懷

王八京九月流吉陽軍與侍御史濟寧邱世傑

同渡海世傑流萬安軍明年天曆己巳至郡守

聞仕熙來先爲營居城中及至惡其完美乃於

城西陋地茅屋借居之名曰水北新居又於旁

西南數十步築江亭爲遊息地嘗作雲山辭曰

山氛氲兮出雲又泠泠焉以雨倏日出兮雲飛

山青青兮極浦橫浮雲兮水粼粼擧杜若兮采

白蘋葺荷宇兮桂爲棟臨江皋兮悵懷人每靜

住一室累日不出中庭郡人士及吏卒相接者甚加禮貌屢爲縣尹陳元道所侮優禮之不校郡縣時政利害未嘗出諸口非公事及宴請不苟出惟劬書酷詠爲娛恬然不見其去國之意遠近皆敬愛得其文字珍藏之後居瓊冬初許歸田里明年春寧宗立與世傑同得旨還壬申六月復錄用

阮通志

月魯帖木兒致和元年河南行省平章伯顏矯制起月魯帖木兒爲本省參知政事共議起兵月魯帖木兒固辭曰皇子北還問參政受命何人則將何辭以對伯顏怒丞相別不花亦與之有

瓊山縣志

卷十八

官師四流寓

十七

隙乃謫月魯帖木兒乾寧安撫司安置至順四

年移置雷州

元史本傳

懿憐真班

府志作亦憐真班

西夏人剛正有禮法厯事仁

宗英宗文宗順宗四帝丞相伯顏專擅疾之以翰林學士出爲江南行臺御史大夫尋殺其子答里麻而謫置海南伯顏敗乃還

元史本傳

明

汪廣洋字朝宗高郵人累官江西參政入爲中書省參政出參政陝西洪武三年召爲右丞爲左丞楊憲所忌嗾御史劾廣洋奉母無狀帝切責放還鄉憲再奏徙海南憲誅召還

明史本傳

薛祥字彥祥無爲州人洪武八年授工部尙書明年收天下行省爲承宣布政司以北平重地特授祥三年治行稱第一爲胡惟庸所惡坐營建擾民謫知嘉興府惟庸誅復召爲工部尙書明年坐累杖死天下哀之子四人謫瓊州遂爲瓊山人孫遠正統七年進士參明史葉楊升字起宗永嘉人洪武間寓瓊三十餘年通春秋博洽能文郡縣諸家撰述多出其手舉臨高校官後以老謝政與郡守王伯貞友善嘗改蔡正菴瓊海方輿志文行冠一時年八十八終郝志

瓊山縣志

卷十八

官師四流寓

十八

康鑑蘄州人父茂才元末結義旅以捍衛本州官宣尉使都元帥洪武克金陵率部兵三千解甲來附從征十餘年累立大功追封蘄國公子鐸襲封蘄春侯絕鑑以庶子襲指揮洪武十九年爲事發雲南金齒衛充軍明年召還以風顛廢職給賜奴李馬兒等九十四名海南衛安置後裔籍瓊山之官隆蕭志穆惟敬汴人洪武初監察御史以謗謫戍海南衛李安仁山東人亦以監察御史謫瓊州

解縉字大紳吉水人洪武戊辰進士永樂初召縉備顧問累遷侍講學士直文淵閣預機務寵信

賞賚有加進翰林學士兼春坊大學士未幾交
趾用兵縉疏諫成祖不悅遂疏之出爲廣西參
議經廣東遍遊名山淹留浹旬嘗至西樵題廖
謹讀書處郝通志過臨高爲縣丞陸昇題雪冤致
甫卷廣西通志李至剛劾其怨望恣逞改交趾八年
人奏事南都值北征漢王高煦素怨之誣奏下
獄卒郝通志

王直洪武末隨父伯貞來學郡齋幼好遊賞民有
張思憲者每登臨必與之時郡俗村落鹽蛋小
民家婦女多於月明中聚紡號曰紡場直爲思
憲所導亦遍遊觀因作紡場賦黃通志

瓊山縣志

卷十八

官師四流寓

十九

崔永海鹽人母韓氏隨繼父謫海南永徒走求其
母時繼父已歿有司以配屬不許歸永號泣請
於朝許之遇風舟覆永入水負母因感疾卒江
西省臣以聞詔賜祭葬給驛舟歸其母永數往
返廣海間人皆以孝子稱之郝通志

徐益字咨益豐城人洪武間從父戍瓊博通經史
尤長詩賦爲鄉校師尙書薛遠輩皆出其門與
王霜筠楊行素朱四吟等相友善王霜筠有詠
史詩行世益嘗爲之校正云

吳均字平仲臨川人朱繼字伯紹莆田人鄭觀字
尙寶三山人洪武末俱寓瓊州從學於趙考古

先生俱擢高第俱同上

梁良玉定海人建文中官中書舍人建文亡變姓

名走海南鬻書以老阮通志

鉞仲名鄧人子鉉建文初為山東參政燕兵攻德

州遂攻濟南鉉乘城守禦凡三閱月卒固守不

能下帝聞大悅遣官慰勞賜金幣封其三世擢

山東布政使進兵部尚書盛庸為平燕將軍命

鉉參其軍務四年燕兵渡江鉉屯淮上兵潰燕

王即位執之至反背坐廷中謾罵令其一回顧

終不可遂磔於市年三十七時仲名年八十三

與妻薛竝坐累安置海南明史鉉傳

瓊山縣志 卷十八

官師四流寓 二十

唐益原志作馮益字損之慈谿人博學多能景泰間以

教授同汪洋伍宗德配瓊天順初釋歸蕭志

汪廷貞湖廣石首人為鹽課提舉公寓海外瓊郡

立沿海諸場社學以教俊秀其在小英者曰樂

古書院置義產為諸生膏火專使延請新會陳

獻章主講以老病辭因復書致意廷貞錄書刻

石於小英築一亭名曰懷沙據懷沙亭碑今祀陳先

生於樂古書院以汪公配之採訪冊

莊維春閩人年十三時父官瓊州維春往省之將

抵海陬作詩曰十里至海路已絕四面無村人

獨行百夢不能一到此雙親猶自隔蓬瀛後官

至豫章太守

阮通志

艾璞字德潤南昌人幼警敏擅文名登成化辛丑進士授兵部主事累官都御史巡撫蘇松諸郡所至有聲嘗奉建儲詔使朝鮮歸橐蕭然詔求直言首陳愼修德等六事又陳聖政等四事皆人所難言有勲戚家與無錫民爭田璞承勘廉得其情悉歸之民勲戚家行賕逆瑾中主復勘使者承風旨劾前勘非實瑾矯旨逮獄訊之不屈箠杖幾死徙家海南爲編氓瑾誅奏詔還官致仕時言者交薦之未及用而卒

阮通志

連威永年人兩淮鹽運使張瓚化直隸人兩淮鹽

瓊山縣志

卷十八

官制四流寓

三

運同正德中均以忤劉瑾謫瓊州

蕭志

國朝

楊纘烈潮州人纘緒之弟乾隆初三王講蘇泉書院勤於講解嚴立課程教人讀書以四書爲主其餘經史必約之以四書然後爲有用士多從之嘗登明昌塔有記云中秋前三日武溪馮愧齋元侗瓊臺邱衡之璣二明經邀余遊大悲閣閣離書院二里許閣後一塔巍然名明昌則浮粟泉亭所日夕瞻眺者也出書院折而東行不數武衡之指謂予曰蘇公雙泉故跡一在書院一在此坡之麓田塍間幼時及見豐碑穹隆大書

蘇公雙泉之一字樣去浮粟泉咫尺地耳井渫不食日就淤塞今則碑石亦摧斷不復見矣易曰時舍洵可測夫將抵閣過一畧約愧齋曰予得句矣紆廻竹逕橋通寺予應聲曰徙倚泉亭塔對門衡之曰邑誌塔爲萬厯間郡伯涂公文奎邑人給諫許公子偉糾鄉士夫共建者也愧齋曰子聞志載海忠介公春日同許給諫諸文學登明昌塔絕頂詩乎遂朗誦曰縹緲丹梯此共登側身雲壑擬飛騰天連滄海孤懸嶼人立青霄最上層望氣幾年逢尹喜傳衣何處是盧能摩空捧日屬吾黨雁塔龍門次第升予曰此

瓊山縣志

卷十八

官師四 流寓

二十一

詩不類必爲好事者僞託未幾僧法空道迎進閣閣前後兩座各三楹氣象光潔花木清幽頗有靜致茶畢予與衡之轉出閣後攝齊登塔之第一級四面瞻眺心目曠怡忽海風怒吼絺綌淒其凜不可當乃亟下仰觀正南塔門橫嵌一石鑿明昌塔三大字左記萬厯三十八年歲在庚戌季冬吉旦右刻瓊州府知府翁汝遇同知某通判某推官某鼎建共三十九字正北一石年月與正面同正西一石左記萬厯二十五年歲在丁酉孟冬吉旦右刻瓊州府李多見同知某通判某推官某鼎建皆共三十九字正東一

石僅存萬厯四丙申肇基七字其四字之上下皆模糊不可識右邊依稀文奎二字予謂衡之曰修邑乘者曷不據此且計建塔費不下萬金僅此一片石載年月姓名不別立碑作記誇張豪舉此前輩古道可法處也旣而風定復登塔故七級八觚每級皆嵌橫石八方各有題識及姓名大抵李翁同時人登至絕頂第七級有鐵柱一字多剝蝕第一行爲吏科左給事中臣許子偉拜手十二字第二行爲太祖高皇帝稱南溟竒甸十字餘語似贊似銘總不及建塔原委其末一行爲龍飛萬厯二十七年己亥辛未月

瓊山縣志

卷十八

官師四流寓

三十一

甲辰日鑄十七字至是全塔有字之石皆竭目力細辨之矣雖當登高無暇望遠每降一級命從人持筆研或備或殘鈔所可辨嗣是寺僧具齋畢徐步踏夕陽歸舍去故逕登平隴周望海山斜暉暮煙竹樹秋色蒼然就淺草塊莽中隨意闢蹊而行仍况二先生小憩書院瀾茗取架上郡邑志參考之按邑乘載建塔爲涂許二公考府志涂卒於瓊任繼之者爲李公多見厯吳公尚友倪公凍卽爲翁公汝遇皆不載厯任年月涂無傳李翁二傳不載建塔之事當是載筆者簡畧抑善政有在塔固無關於輕重歟獨怪

許給事傳生平義舉一一詳記何以竟無一語道及協力建塔一事再考海公於明世宗朝以戶部主事建言忤旨下詔獄穆宗立詔復其官改大理擢僉都御史巡撫應天尋棄官歸里閱十五年起用南僉都御史是爲萬曆十三年乙酉洊歷吏部右都御史掌南院越二載丁亥卒於官而許公於前一歲丙戌始成進士詩題何以遽稱同許給諫耶衡之曰海公墓碑現鐫護喪行人許某夫考古之學以金石文爲覈今據塔額年月由丁酉逆數至丁亥海公卒已十年由丁亥順數至庚戌海公卒已二十有四年矣

瓊山縣志

卷十八

官師四 流寓

二十四

乃不悟登塔詩題爲僞而登之藝文而謂珥筆纂修者果足傳信否耶總之此塔之建涂與許或並有椎輪之功而實資李公經營復賴翁公而後合尖則確無可疑修志者獨歸之涂許疎漏已多至於海公在乙酉以前逍遙林下有可登塔之日修志者於此得毋蒙檮昧之嘲歟二先生皆首肯口然於時椰葉徐鳴月色如霜愧齋援洞簫奏水龍吟一弄別去

舊志

吳光昇號蘊潭浙江人乾隆辛酉舉於鄉計偕遊京師館於朱氏時太傅朱文正公珪及兄垣筠皆受業焉學問淵博淹貫經史識力精卓賞鑒

無差丙戌丁亥間巡道王錦延請來瓊王講瓊
臺書院日與諸生課文論詩口講指畫娓娓不
倦刻有瓊臺書院課藝至今傳誦焉一時名士
多出其門科甲彬彬稱盛以巡道去任還京士
林欽其教澤設主祀於瓊臺書院

張志

瓊山縣志卷之十八終

官師四 流寓

二十五

瓊山縣志 卷十八

